

Pisinermut inatsisip nutartereqarnissaanut, imaluunniit pisap Kalaallit Nunaannut nuunneqarnissaanik, taamatullu nammineq malittarisassiuussisinnaalernissamik siunertaqtumik Naalakkersuisut danskit naalagaaffiannut saaffiginneqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Naaja Nathanielsen, Inuit Ataqatigiit)

Akissuteqaat

(Inuussutissarsiornermut Aatsitassanullu Naalakkersuisoq)

Siullermeerneqarnera

Aallarniutigalugu Inatsisartunut ilaasortaq Naaja Nathanielsen, Inuit Ataqatigiit, aalajangiiffigisassatut siunnersuuteqarneranut qutsavigerusuppara. Pisinermi inatsit taama pingaaruteqartigisoq oqallisigissallugu Naalakkersuisut kajumerilluarpaat. Pisinermi inatsisip niuertut pisisartullu akunnerminni pisinnaatitaafiinik qularnaarisuuvoq, kiisalu pisinermi tunisaqarnermilu inatsisitigut niueqatigiinnermi toqqissisimasumik tatigeqatigiinnermillu pilersitsisarpoq, ataavartumik pigisanik niueqatigiinneq eqqaassanngikkaanni.

Pisinermi inatsit maanna atuuttoq 1906-imeersoq sioqqullugu nunat avannarliit ataatsimoorullugu inatsisisamik piareersaateqarput annertuumik, ukiuni arlalinni ingerlasumik, niueqatigisartakkat niueqatiginerusat akornanni paasinartumik ataqatigiissumillu inatsiseqarnissaannik qularnaarinntussamik. Pisinermi inatsit maanna atuuttoq ukiut 104-t matuma siornatulli ataasiakkaanik allannguinerit eqqaassanngikkaanni suli atuuppoq, nunanilu avannarlerni tamani atuuttuulluni. Piffissap ingerlanerani allannguutit takkussuussimasut atuisartut politikkikkut suliniuteqarnerinut pisariaqarsimapput, soorunami aamma Kalaallit Nunaanni atuutilersinneqartariaqarlutik.

Pigisanik inatsisitigut tunngasortai pillugit aaqqiissutit ataatsimoortut maanna Naalagaaffiup Ombudsmandeqarfiani nutserisarfimmi nutserlugit ingerlanneqarput, tamakkununnga ilaallutik pisinermi inatsisip allannguutai nutajunerusut, atuisutut isumaqatigiissut pillugu inatsit, ilaatigut internetsikkut pisinermi peqqissimisinnanermut pisinnaatitaaffit aamma ernaliat pillugit inatsit. Qularnanngitsumik 2010-mi UKA-mit saqqummiunneqartussanngorlugu naammassineqassaaq. Siunnersuut tunngavigalugu pisinermi inatsit atuisartunut politikkimut nutartereqassaaq, malittarisassallu nutaat iluarsineqarnissaat qulakteerneqassalluni, nunat suleqatiginerusartakkatta tungaannut assingunerusumik siunertaqtinnejqassallutik.

Naalakkersuisut inatsisip ataatsimoortup saqqummiunneqarnissaanut, atuisunik tunngaviusumik qulakkeerinnittussaq, pigisaqarnermullu inatsisitigut sammisoq oqallisigineqarnissaat qilanaaraat, kiisalu nunat avannarliit ataatsimoorussamik inatsisigut suliniutit aqqutigalugit qanoq ilisukkut inatsisitigut pitsasumik suleqatigiinnissap atatiinnarneqarnissaa qilanaaralugu.

Tamatumunnga ilutigitillugu Naalakkersuisut suliniutigissamaarpaat, Pisineq pillugu Inatsisip nunatsinnut nuunneqarsinnaaneranut periarfissat paasiniasiassallugit, taamaattumillu inassutigerusullugu aappasaarinninnissaq 2010-mi UKA-mi ataatsimiinissamut kinguartinneqassasoq.